

SOPHONIE

1 Ajô Jehova, di e nga zu be Sophonie mone Cuschi, mone Guedelia, mon Amira, mon Ézéchias, melu Joisas mon Amon njô bôte ya Juda, a nga to.

2 M'aye mane jiane biôme bise ne meñ afa'a ya si, nalé Jehova a jô. 3 M'aye jiane mô't ba tit; m'aye jiane anone ya yôp, a kose ya mañ, a mam m'akolé bôt abak ba be bôt be ne abé; a m'aye tyi'i mô't ase a to si nyô, nalé Jehova a jô. 4 Nde m'aye same wo wom mfa'a ya Juda, a mfa'a ya bôte bese be to Jérusalem ; a m'aye tyi'i mebuka'a me Baal vôme nyô, a jôé ya Chemarim ba be beprêtre; 5 nalé fe ba b'akañ nsamba ya yôp mendile yôp ; a ba b'akañ, be kañe'e Jehova mengana, a kane mengana a jôé ya Malcam ; 6 a ba be bulaneya mvus mfa'a ya ntôñane Jehova ; a ba be nji jeñe Jehova, nge sili mfa'a wé.

7 Tabe'e évô vôm Tate Jehova a to ; amu mô'se Jehova ô nto bebé : amu Jehova a kômeya ntyi'ane biôm, a maneya fe tune beyeñe bé. 8 A ye bo na, mô'se Jehova a ye tyi'i biôm, m'aye lepe bivet, a bone be njô bôt, a ba bese b'ajaé mengômesane ya meyoñe mefe. 9 Mô's ôte m'aye lepe ba bese b'ayôô éyoñ b'adañ mbô'ô mbé ya si, ba b'ajalé nda ésa wop a mame ya évo a medu'an ne lut ! 10 Jehova a jô na, Mô's ôte tyiñe ya ñyôn j'aye so mbé kos, a ñyiane du mfa'a ya étune nlame baa, a beta éduñ mfa'a ya minkô. 11 Yian, mia bôt mi to Mactesch ; amu bôt bese ya Canaan be se fe ; ba bese be nga be'e argent be maneya tyi'iban. 12 A ye bo na, éyoñ éte, m'aye jeñe Jérusalem été a belampe; a m'aye lepe bôt be maneya lik aval ane vin, ba b'ajô minleme été na, Jehova a ye bo te bo mvaé, nalé fe a ye bo te bo abé. 13 Nde akume dap d'aye bo jôme ya sa, a menda map m'aye bo bifut: ya b'aye lôñe menda, ve te ke tabe me; b'aye bé mefupe mindik, ve te ke nyu vin ya été.

14 Beta mô's ya Jehova a nto bebé, a nto bebé a zu avô, a ne na, tyiñe ya mô'se Jehova; éwôlô mô't j'akuli mbia miñyôn vôm ate. 15 Mô's ôte ô ne mô'se ya ayaa, mô'se ya njuk a biyebe, mô'se ya njian a éndaman, mô'se ya dibi a ékukut, mô'se ya minkut a dibi e ne afip, 16 mô'se ya toñ a mbetane tyiñ, mfa'a ya wosane minlam mi ne nlôñane a alem, a mfa'a ya meka'a me ne minlôñane ngule yôp. 17 Nde m'aye zu nju'u be bôt, ajô te b'aye wulu aval ane mindidim, amu be maneya bo Jehova abé; metyi map m'aye sôébane si aval ane mbuluk, a minsône miap aval ane mebi. 18 To argent wop, to or wop, te ke jôm j'aye bo ngule ya nyii be mô'se ya ayaa Jehova; ve si se j'aye di'iban nduane ya abane dé: amu a ye mane bôte bese be to si nyô, ya, a ye mane be angônda mmanan.

2 Mi sula'ane vôme wua, ya sula'ane vôme wua, A ayoñe bôt e ne te wô' ôson; 2 éyoñ mvinda é ngenan te kuli mam mé, éyoñ mô's ô ngenan te lô't ane bikôla'a bi nlisi, éyoñ mbia ayaa ya Jehova a ngenan te kui be mia, a éyoñ mô'se ya ayaa Jehova ô ngenan te kui be mia. 3 Jeñane Jehova, mia bese mi ne minlem évôvoé si nyô, mia mi maneya ba'ale memvinda mé; jeñane zôsô, jeñane bivôvoé minlem: ndô'ôtô mi a ye soléban mô'se ya ayaa Jehova.

4 Amu Gaza aye li'i, a Askalon a ye bo ne sañgan ! b'aye titan Asdod zañe mô's, a Ékron a ye tébane si. 5 Ngo'o bôt be to nsa'a mañ, ayoñe Bekéréthien! Ajô Jehova e ne wo ngame yat, A Canaan, si ya Bephilistin; m'aye jiane wo, ajô te mô'te ya tabe a ye bo momo be wo. 6 Nsa'a mañ w'aye bo vôm mimbam mi aye di, ô bili bone menda mfa'a ya beba'ale mintômba, a mebemba mfa'a ya mimbam. 7 Nsa'a

mañ ôte w'aye bo jôme ya mebuka'a me nda bôte Juda; b'aye ve mimbam miap bidi été; b'aye bômbô si mam me ngô'é menda ya Askalon été; amu Jehova Zambe wop a ye jome be, a bulane be mfa'a be nga to minkôm.

8 Me wô'ôya ébiasé ya Moab, a mbia nkobô ya bone be Ammon, mbie be nga biasé bôte bam, a bete bebiene yôp a wosane nné wop. 9 Ajô te, ane me vee, nalé Jehova ya minsamba mewosan, a jô, na, Moab a ye fo'o bo ane Sodome, a bone be Ammon ane Gomorrhe, jôme ya sas, a bibé bi nku, a bo ne sangañ nnôm éto: mebuka'a me bôte bam m'aye sa be, a mebuka'a ya ayoñe dam m'aye nyoñe be ane ngap. 10 Jam ete nde b'aye bi amu mebune map, amu be biaséya bôte be Jehova ya minsamba mewosan, a be beteya bebiene yôp a tebe be ngame yat. 11 Jehova a ye bo angôndô be be; amu a ye kôtô bezambe bese ya si nyô a zaé; a bôt b'aye kañe nye, môt ase vôme wé, ja'ane bikôte bi mañ ya meyoñ bise.

12 Mia Beéthiopien fe, mi aye wôéban a nkpwaté mekône wom. 13 Nalé fe a ye same wo wé mfa'a ya nord, a jian Assyrie, a bo Ninive ne sangañ, a kôte nye aval ane fé. 14 Mimbam mi aye bômbô zañe jé, betite bese ya meyoñ: ngôkoé ba ngôm bi a ye tebe mendo'o ya été été; tyiñe jap j'aye kui bone mimbé été; éndaman j'aye bo mfa'a ya mimbô'ô mimbé ya si: amu a kuliya mimboane ya bilé bi cèdre atan. 15 Nlame ya mevak ô nga to njem ñwô le, wu ô nga jô nleme été na, me to, a jôm éfe é nji bo ve ma: aka'a ndaman ô maneya ndaman, ô nto vôm betit b'abômbô si! Môt ase a ye lôte wô a ye vim, a fô'ô wo wé.

3 Ngo'o nyô a ben njôan a maneya bobane mvin! nlam w'akpwe'ele bôt! 2 Nwô ôte ô nji ve tyiñe mewôk; ô nji nyoñe melep; ô nji buni Jehova; ô nji ke Zambe wé bebé. 3 Bivete bié bi to wo zañ bi ne ane beñbweñbwem b'abam; betyi'i mejô bé be ne ane mekamenyañe ya mam me ngôé; be ne te li'i jôm akui mam me tyé. 4 Bekulu mejô bé be ne bivevese bi bôt a njoñ; beprêtre bé be maneya ndaman étyi ya vôm a ne étyi, be maneya tyam metiñ a évô. 5 Jehova a to wo zañ a ne zôsô; a ye ke bo mbia jam; tyé ése a kuli zôsôa ntyi'ane mejô wé éfufup, a ne te selan; ve ba be to te bo zôsô be nji yem ôson. 6 me maneya tyi'i meyoñ; meka'a map me mbe nlôñane ngule yôp me nto zesé ; me ndamaneya minseñe miap, ajô te môt a nji lôt; minlam miap mi nto ndaman, ajô te môt a nji fe bo, môte ya tabe été a nji fe bo. 7 Me nga jô na, ko woñ ve mfa'a wom; wô'ô melep; nde te nda a to j'aye bo te tyi'iban, aval ese ane me nga tyi'i ajô dé: ve be nga kune kôlô si a ndamane mimboane miap mise.

8 Ajô te yanga'ane ma, nalé Jehova a jô, akekui môs m'aye kôlô si a bo ébi ; amu ntyi'ane ya nleme wom ô ne na, me kôane meyoñ, nde te m'aye sulane minjôan, amu m'aye sôé ayaa dam be be, mbia ayaa wom ase; amu si se j'aye di'iban nduane ya abane dam.

9 Amu éyoñ éte m'aye bulane ve bôt nkobô ô ne mfuban, nalé ate b'aye loene jôé Jehova bese, a bo nye ésaé nleme wua. 10 Bôt b'aja'é me mam, be ne na, ngone ya bôte bam be nto ne mialamialan, b'aye zu mveane wop, be so' asôé ya Éthiopie yat. 11 Môs ôte w'aye bo te veban ôson amu mimboane miôé mise, mmie ô nga kop mfa'a wom ; amu éyoñ éte m'aye vaa bôte bôé b'afôn a mebun zañe jôé, a w'aye bo te beta bo mebun nkôle wom ô ne étyi. 12 Ve m'aye li'i bôt be ne éngôngo a azoé zañe jôé, mbe b'aye sobô jôé Jehova été. 13 Mebuka'a me Israël m'aye bo te bo abé, nge kobô minsos; nalé fe ôyeme ya medu'an vi aye bo te yené anyu dap été; amu b'aye di bidi a bômbô si, te ke môt a ye ve be woñ.

14 Yi'a bia, A ngone Sion; bete'e tyiñ, A Israël; va'ak, a fôn a nlem ôse, A ngone Jérusalem. 15 Jehova a vaaya mekua môé a wuaya nsiñe wôé atan: Njô Bôte ya Israël, Jehova, a ne wo zañ; w'aye bo te beta ko abé woñ. 16 Môs ôte b'aye jô Jérusalem na, Te ko woñ; A Sion, te me'ete na, mo môé me jôlô. 17 Jehova Zambe wôé a ne wo zañ, nyô a ne éwôlô môt j'aye nyi'i wo ; nnye ate a ye va'a meva'a be wo ; a ye wo'an nye'ane wé été; a ye va'a be wo a ñyiane bia. 18 M'aye sulane ba b'awô' ôlun amu beta nya ésulane, mbe be mbe bôte ya be wo; mbe be nga yen mbe'e ô nga to be nye ane jome ya ôson. 19 Tame yen, m'aye lepe be bese b'aliti wo njuk éyoñ éte; a m'aye nyii jôm é ne éyem, a kôane jôm be nga titane fé; a

m'aye bo be jôme ya kañ a ve be jôé, mbe ôsone viap ô nga to si nyô ése. 20 Eyoñ éte m'aye zu mia, a éyoñ éte m'aye kôane mia; amu m'aye ve mia jôé a дума meyoñe mese ya si nyô été, éyoñ m'aye bulane mia mfa'a mi nga to minkôm, mise menan me lô, nalé Jehova a jô.